

續修四庫全書



《續修四庫全書》編纂委員會編

續修四庫全書

上海古籍出版社

一三二五・集部・別集類

栖碧先生黃楊集三卷補遺一卷附錄一卷	〔元〕華幼武撰	一
茶山老人遺集二卷附錄一卷	〔元〕沈貞撰	六三
梅花百咏一卷	〔元〕韋珪撰	八一
韓山人詩集九卷 韓山人詩續集八卷	〔元〕韓奕撰	九七
後圃黃先生存集四卷	〔元〕黃樞撰	一九七
雪厓先生詩集五卷	〔元〕金守正撰	二四三
吳書山先生遺集二十卷首一卷末一卷	〔元〕吳會撰	二七九
得月藁七卷	〔元〕呂不用撰	三三七
鐵崖賦藁二卷	〔元〕楊維禎撰	三九一
鐵崖樂府註十卷 鐵厓咏史註八卷 鐵厓逸編註八卷	〔元〕楊維禎撰 〔清〕樓卜瀾注	四三三

重刻黃楊集序



夫人有遠體。尤有遠致。致正目難有意。無意之間。一似蘭之挹露。柳之籠煙。芙蓉之映波。如暮之

於生物之相吹。以自然憊而不覺。其脩然遠之。以今觀於栢碧華翁。不其然乎。翁少孤。屹自成立。自母外。靡日不以

好士為務。始素封而從脫。既兵燹而飢隨。不毫毛挂其胃懷。爾時如黃天獻。張潞公。布衣陳子平。方外張伯雨之流。皆樂與

之游。洋洋灑灑。亦能忘其奉母有春艸軒。不東隱。其草叔喜暉之句。自居栢碧軒。取太白問余栢碧山之句。嗟乎。可想其致矣。

栖碧先生黃楊集

〔元〕華幼武撰

據明萬曆四十六年華五
倫刻本影印原書版框高
一八五毫米寬二四六毫米

迨讀翁所為黃楊集。雖
余素不解詩。不敢孟浪
品題先輩。第其中致
語良多。如漁父休歌。水
清濁。高人不與世浮沈。

黃楊集序

云。何必解人。迺鏡面。嗟乎。又可想見其盛矣。余
視他雪。元來定問。雅志
恬曠。不樂仕進。
國初解署。其縣學。

楊鐵崖陶南村友義。
嘗乞其齋曰聽雪。而豫
章胡大司馬為之。後
不與翁同遊。云。翁素
父隆母孝。按羣羊。品
友。宗姻友舊間。好外其
懷。不第以訪人目之。抑
者。持也。持人情性。三
教義歸無邪。可不謂
致。以自來歟。余記之。容許。

黃楊集序

兩年習其門風。再習其
祖先遺集。遂。新駕。項
垂刻。以羽集。屬余序之。
夫碎金彩璧。百世王謝
家物。而不有。賢子孫。將

無作。當。前。之。在。乎。子。宏
收。立。多。也。

戊午秋。口。長。水。孫。弘。祖。題
於。鸞。湖。之。松。石。間。

十世孫與進敬書



葉鐵栖碧先生詩集原本序跋

黃楊集序

詩由日鍛月鍊然後工。亦由隨事感發。肆然爲
之。然後熟。辟之水。愈汲則愈混。混來而莫之遏
也。華彥清氏。愛詩甚篤。而專於多事。予棄此二
年矣。見其錄成帙者。未肆然而爲之也。因戲題
其端曰黃楊集。世傳黃楊之爲木。遇閏歲則厄
而不長。彥清能不爲閏所厄。則于霄聳壑。予將
承其餘陰之下矣。彥清勉乎哉。谷陽陳方題

黃楊集序
續黃楊集序

始予至無錫。與華彥清伯仲論詩。舉能知所鄉
背。得他人一章一句。吟諷未絕口。固已懸衡於
胸中矣。至其精詣。或有布韋所宜左辟者。私心
異之。未嘗以語人也。一夕燈下坐語。彥清出一
帙示予。觀之。則所鈔杜子美近體詩也。隨其行
瀾狹。用朱書小字夾註殆遍。其說曰。某爲對起
對結者。某爲散起散結者。或緣某句應某字。或
由某意發某語。脈絡有自來。枝葉有所傳。著問

之則默然良久曰。此陳君子貞筆也。惜乎其不能終是帙而往矣。久之彥清有所述。又出以示予。往往與前所論說若注杜詩者合。予然後知彥清非漫焉而賦者也。彥清於伯仲中。又獨喜下筆於人盡商訂。此其詩雖頗艱得。而稱量隱括。曲盡其所用心。以故子貞題其集曰黃楊。蓋勉其無厄閏云。至辛卯歲。稍爲疾。疾苦。家居無事。益以詩自娛其意。謂有肆然爲之之漸。以無負乎子貞之所期望者。輒別具一集。屬予序焉。

予獨謂黃楊楊之族也。楊爲木。喜近水。發榮滋長。朝而尺。夕而尋。若易易然者。就其文理堅緻。膏液純足。充然固。龐然厚。自根株而條葉。一無所散耗者。唯黃楊爲然。使是木也。捨其質性之至充。而有慕於他楊之易茂。不幾乎持千金之璧。以易瓦缶者之爲哉。甚矣茲木之退乎閏者。乃所以遙乎閏也。名集黃楊固當。於是仍題黃楊集而歸之。是歲爲至正十一年十一月十三日也。吳郡陳謙書。

錄梓黃楊集引

栖碧先生。姓華氏。諱幼武。字彥清。無錫之梅里人。世有隱德而好施。鄉人賴之。早失怙。母陳氏守節。元至正初。旌表其門。先生奉養盡事親之道。嗜學禮士。真實不倦。誠素和惠。待下慈愛。未嘗愠色。家素多貲。泰然不以富爲驕。後燬於兵。坦然不以貧爲戚。尤工於詩。吟咏情性。造次不輟。年六十九。病卒于家。詩凡六卷。名黃楊集。緯文從游既久。得其稿於其子公愷。敬請錄梓。以廣其傳云。門人呂緯文敬識。

黃楊集後序

作詩難。觀詩尤不易。詩有境與物。事與意之分。然境物易狀。而事意難工。惟杜工部善寫境狀。物莫不曲盡。紀事託意。莫不詳切。後有作者。豈能過之。今觀栖碧翁之詩。一以工部爲法。凡其爲語。皆有來自。必準則而步驟之。可謂善觀古人之詩矣。然世爲鉅室。而不以純綺奪其志。卽其蚤歲。固已以詩鳴。中更變故。遷徙不常。雖顛

沛造次間。必以詩見之。且句不苟造。章不漫成。鍛鍊組織。務去其粗鄙。而求其雅麗。不溺於富貴穠茂。不偏於山林枯槁。長篇大什之春容。短金絕句之潔淨。其苦吟有人所不及者。今豈易得哉。翁既沒。其仲子公愷。手編其遺稿示余。因俾其外孫楊釋。重爲繕寫。門人呂緯文。鋟木而廣其傳。吁。翁自癸巳歲。無錫之故宅既燬。再遷而值兵燹。後移家蘓城之東門。繼遷海虞邑中。後又遷吳興之金徑。長洲之周莊。晚而還鄉。將復理田園。惜未及而逝。然其處患難流離。未嘗廢吟咏。愈老而愈工。則其胸中。不以窮通得喪易其志。槩可見矣。況有子有孫。躬耕而樂道。隱居以繼志。則翁亦何憾耶。視曩年富貴之人。湮沒而無聞者。何足算也。余於是重感慨焉。翁華氏名幼武。字彥清。爲無錫人。栖碧其自號云。洪武丁卯閏月廿又三日。包山樵人俞貞本序。

重刻黃楊集後語

七古祖栖碧先生。有遺稿曰黃楊集若干卷藏

於家。其詳具載前後序中。蓋古之所謂逸民。窮而工於詩者也。明詩選粹皇明詩鈔與錫山道響。雖互取數首。而傳之未廣。人鮮得而見之。今按察使是堂俞公。欲編輯盛明百家詩。上自縉紳。下至韋布。罔不蒐括。察乃於所藏集中。手錄諸體。凡百二十有八首。以備未擇。非敢有所可否於其間也。第百家詩卷帙浩繁。一時未易就緒。茲本恐其久而散失。因屬兄子承業。鋟梓以傳。並不敢沒先人之善云爾。顧察無似。嘗將負館職餘二十年。不能為先生作一逸民傳。纂入國史。用垂不朽。而區區表揚之志。僅止於斯。不亦可媿也哉。隆慶二年。歲在戊辰。夏六月。既望。翰林院侍讀學士裔孫蔡薰沐百拜書。

黃楊集上卷目錄

五言古詩

雲松巢

登惠山

贈梅孝子榮甫孝感詩

厚本菴覺上人東歸奉寄三十韻

夜坐

長廣溪漁翁頌吾祖之德感慕成詩

上巳舟中值雨

送姪擴之通州

次韻曲林見寄

奉謝琴川鄭氏昆季

貞孝篇美顧宗彥母子也

贈呂彥經

七言古詩 歌行附

隱微道人今年禱雨者再皆驗頃為余家

禱之亦驗作喜雨謠以謝之後至元二

年也

發曹湖

送林子明嘉定賣藥

惟中自嘉禾歸觀賦此寄之

送三茅陳嗣師還山

題曹氏春江雲舍圖

觀王仲彰菊圃

孤飛燕

九日見菊

蠶婦詞

雁南飛

編籬曲

義兵行

青山歌寄翟仲謙呈東湖叔兼簡彥容弟

楷瘡馬圖行

樂存堂歌為吳江陸彥祥賦時二親同壽

八十也

憶昔

上卷目錄

栖碧先生黃楊集卷上

古詩五言

雲松巢

天上多白雲。山上多青松。白雲出松間。秀色如芙蓉。縹緲神仙宅。彷彿蓬萊峯。松垂戶牖密。雲擁簾幙重。風起秋浩浩。日臨春溶溶。繁陰駐長夏。靈響肅嚴冬。晨出露霑衣。夕歸月啓封。右駕旋白鶴。左驅命青龍。真仙諒愜懣。俗狀詎能容。自顧敢爭席。所願長相從。

登惠山

山色如美人。春風來更佳。幽花發紅彩。細草萋青芽。夜來得好雨。泥軟不濕鞋。豈憚脚力勞。直上窮巔崖。循路盡曲折。躡石如梯階。置身萬物表。高舉若可諧。俯視地上人。何殊井底蛙。城郭縷刻畫。江樹辨雲霾。平壤東入吳。大水北亘淮。日落具區白。氣涵滄溟濳。其下明陽觀。高士神仙僭。衣冠不入市。飛昇無遺骸。峻節皎日月。慙愧非吾儕。老僧偶相值。邀我林下齋。既汲泉煮

茗。復以酒沃懷。情真語頗率。謝去傷多乖。世道數齟齬。疇能徧天涯。

贈梅孝子

水木有本源。俯仰感乾坤。誰無寸草心。可以報親恩。中吳梅氏子。庭闈母獨存。高年嬰痼疾。憂心一何煩。爰事虔禱間。天地黯慘昏。精誠破陰曉。孝念達帝閭。雲漢昭天章。璣衡麗微垣。真宰既已假。靈貺鍾其門。願秉此時心。終身矢弗諼。肅敬將肴膳。婉容奉笑言。采采南陔蘭。萼萼北堂萱。勗哉盡子職。天錫慶彌敦。

厚本庵覺上人東歸奉寄三十韻

生無功名志。四方謝經營。守拙在村野。洒掃事墳塋。惟我曾大父。梅里營佳城。松楸四十載。枝幹重重生。子孫五世衆。能保枯與榮。林外結精舍。歲時奉粢盛。似非象教力。無以存遠名。惠山前朝寺。寒暑幾變更。玉泉蔭翠栢。歷劫無凋零。寺中有尊宿。心比泉源清。感我再三意。瓶錫許暫停。晨鼎香不冷。夕燈火長明。白日禮瑤懺。清

宵閱金經。逝者安玄宅。生者懷至誠。諒發菩提念。永堅蘭若盟。豈意中土亂。盜賊紛縱橫。軍需日夜急。盡向江南征。道釋與黎庶。差役均重輕。委身任鞭撻。但恐違公程。空門本清淨。深慮禍所嬰。中夜理舟楫。飄然望東行。師固方外士。寄迹如浮萍。寧無所任心。答此眷顧情。悵望不可及。流淚浩沾纓。嘆彼蛙蚓輩。安能涸滄溟。一朝就泯滅。卷旗韜甲兵。山川不改色。草木咸光晶。官府有餘暇。土田春得耕。萬姓安舊業。租賦庸均平。再期林泉會。猿鶴交相迎。

夜坐

烈日不易度。清曉殊未來。煩襟結憂思。虛庭且徘徊。炎官爾何心。下土如焚柴。群生苦煎熬。天高難訴哀。入室足蚊蚋。開門多虎豺。膏血喘易盡。骨肉頃見摧。縣吏迫誅求。生涯安在哉。此鳥雀微。潛身蒿與萊。仰望霄漢遠。無由設梯階。願天降霖雨。洗濯無餘埃。舞羽致苗格。歌熏阜

民財。明當逢此時。長吟寫幽懷。

長廣溪漁翁頌吾 祖德感慕成詩

移舟遡春水。飄搖任所適。直汎長廣溪。冷瀉洗塵迹。前峯雨初竟。空翠若可挹。輕波盪晴景。沈澹閃金碧。鷗鷺不驚飛。鳬鷺自浮沒。浩歌放中流。俛仰天地窄。顧我塵俗姿。何有山水癖。溪南見漁舍。茅茨半欹側。叅差數株柳。青蔭稍蒙翳。緊攬柳樹根。褰裳坐磐石。漁父向我笑。愉悅好顏色。問我從何來。言語若舊識。所居只尺地。三

世無改易。昔者盜賊至。蘆葦避鋒鏑。今年八十餘。頗覺少筋力。長年生理處。繞舍菱芡實。南風吹荷花。清香滿吾室。窮冬不知寒。曝背向白日。膝下有長男。夫婦亡疾疫。細女寡少年。守志奉朝夕。一孫與一甥。綢絮供衣食。此心百不榮。棺木具已畢。我憶年少時。曾上君子宅。重門使人迷。若與塵境隔。近聞車馬過。烽火成瓦礫。尚念處士翁。四方頌遺德。我種君家田。往往受惠澤。斯人久云歿。斯德猶記憶。常時語兒女。欲報意

罔極。歛袂聞此言。惻爾潛歎息。人生宇宙內。繁華竟無益。富貴榮一時。草露朝浙歷。何如養方寸。仁愛布民物。流芳施孫子。百世仰憲則。我祖不可見。我心竟慄慄。迴首故園春。潸然淚沾臆。

上巳舟中值雨

蓬上雨聲急。蓬底酒未醒。推蓬看青山。雲氣接溟津。溪傍數株花。紅白亂飄墮。傷心三春事。已逐流水盡。嗟我六十翁。短髮白垂領。漂零未安宅。浩蕩一漁艇。百年能幾何。疇克駐馳景。風流

山陰會。千載迹不泯。愧我蓬蒿人。詩罷聊自哂。

送姪擴之通州

吾族全盛日。家聲詩禮傳。自遭喪亂後。誰能事陳編。猶子苦好學。鄉閭稱獨賢。文采珊瑚枝。照映唐棣篇。時同竹林會。嘯咏相周旋。一朝携酒至。別我荒城邊。借問欲何之。言將適通川。通川渺何許。遠在滄海壖。府侯朱夫子。招我開講筵。老懷極慰喜。別意尤拳拳。江水萬里注。瀉滑急如弦。歷險戒疾驅。中道勿纏綿。蛟龍起春雷。鵬

鵬搏秋天。物遇各有時。立功須盛年。此行非草草。着鞭會爾先。要登青雲路。忠義盡勉旃。舟發梁溪水。帆拂狼山煙。行當賦清句。激此山中泉。

次韻曲林見寄

通衢一傾盖。分手猶惜別。况是忘年交。離緒那可說。蟬鳴野外秋。鴈叫沙頭月。永保松柏姿。同盟歲寒節。

奉謝琴川鄭氏昆季

結交須結心。取友必取德。苟遇同心人。何用曾相識。請君試靜聽。賤子聊具述。區區六十翁。素稟柔弱質。潦倒無所成。頭顱空雪白。十年遭艱險。携家避兵革。閭里俱荆榛。屋廬成瓦礫。飄泊無定所。萍蹤任南北。旅食闔閭城。懷抱常怵惕。豈謂去年冬。大軍至倉卒。譬彼孤飛鴻。哀鳴畏矰繳。又如投林猿。高木何暇擇。拏舟向東去。道路煙霧塞。回帆擬西行。烽火鄉里隔。矯首見虞山。青天數峯出。遙遙竟宵征。那問凶與吉。詰旦達城郭。維舟南關側。浩蕩萍梗踪。彷徨欲何適。

故友若晨星。在眼空歷歷。是邦湖山勝。群英聚
圭壁。屈指數姓名。遺十還記一。遂令兒童輩。咨
度遍尋覓。鄭氏好昆季。相逢悅顏色。一見蓋始
傾。方寸已莫逆。敬我以父執。待我猶子姪。慰勞
未及已。拳拳問家室。大厦讓我居。矮屋自容膝。
軒堂親掃除。俾我安寢食。脩垣障紅塵。清池湛
寒碧。林梅雪的皚。畦蔬翠蒙羃。老檜鬱以秀。高
梧挺而特。物態各有榮。人事何促迫。衰年厭喧
隘。愛此地幽僻。煩懷淨陶寫。庶用遣愁寂。况乃

賢主人。友悌更相得。伯也倜儻姿。英年事書律。
急難妙解紛。出言校而直。深謀及遠慮。靡有毫
髮失。誰能干戈際。豁達露胃臆。空階步月吟。碧
窓張燈奕。度曲變陽春。飛觴走瓊液。欵洽相與
娛。寧忘論三益。仲也青雲器。胸中飽經術。文章
浩波瀾。氣槩壓崑崙。周旋中矩度。勵學寸陰惜。
淮海譽白眉。士林仰嘉則。名已達鳳池。會通金
閨籍。行當步霄漢。九萬搏只尺。蠹我二三子。亂
離墮荒逸。遂謁董氏帷。同瞻管寧席。未諳立雪

意。洒掃勤乃職。諄諄教誨言。亶亶琢磨力。方圓
苟成器。詎敢忘繩墨。叔也正年少。天然美標格。
讀書不輟手。學字已超忽。龍泉未出匣。良玉猶
在石。一旦發光芒。虹貫斗牛赤。由來席上珍。豈
是池中物。庭下棠棣萼。相輝耀春日。庭前紫荊
樹。相看厚培植。美肱共被臥。繆彤自躬責。張公
一忍字。九世不改易。千年見君家。接踵繼古昔。
今者二月初。衰朽忽遺疾。呻吟不絕口。生死莫
可測。妻子顛沛餘。束手竟靡策。感君交誼篤。中
心懷戚戚。百里求良醫。不憚苦馳役。醫亦仗義
入。匍匐過蓬蓽。沃我上池水。沉痾冰渙釋。殘喘
獲再甦。枯萌發春澤。斯文骨肉懿。何有此稠密。
四海皆兄弟。伊誰與儔匹。留連變寒暑。言笑忘
晨夕。良朋長滿坐。俗子迴絕迹。坐我春風中。不
知身是客。義深不可道。肺肝自銘刻。永結同心
友。重以膠投漆。誰知歲寒操。南山有松柏。再拜
聲歌詩。茲懷豈終極。

貞孝篇美顧宗彥母子也

爲子盡孝敬。爲婦不二天。人道故常爾。心匪金石堅。誠能終大志。竹帛光萬年。東林顧氏母。春花正芳妍。懷有穉穉兒。夫君遘迍邐。鴛鴦期白首。分飛去弗還。痛憤不自持。誓欲同九泉。生死固有定。骨肉忍棄捐。尚念百世系。一縷千鈞懸。呱呱何所知。母在兒能全。晝啼夜飲泣。撫育盡愛憐。但使兒在日。夫君如在前。堂上有尊嫜。變故仍後先。焚焚一婦人。萬慮紛相纏。掩鏡屏膏沐。素心操靜專。躬脩蘋蘩事。伏臘滌滌爨。機杼秋風夕。來麻春雨田。軻母我所慕。侃母我師焉。茹苦猶嗜甘。歲華忘屢遷。所願兒長大。頭角見嶄然。詩禮繼先業。復此舊青氈。諄諄承慈訓。孜孜勗勉旃。行義董召南。清脩漢服虔。激勵爲佳士。純孝鄉黨傳。甘旨肅以具。清溫安且便。林筍春自斲。嘉魚朝割鮮。服勤慎色養。兢兢復拳拳。脫穎榛與棘。齊芳芝與荃。家聲振奕葉。青雲煥高騫。載歌栢舟詩。和我貞孝篇。

贈呂彥經

落落岩上松。根踞崖石裂。蒼翠入太清。馮陵幾霜雪。視彼桃李花。芳菲艷陽月。不似岩上松。能持歲寒節。

古詩七言 歌行附

隱微道人今年禱雨者。再皆驗頃爲余家禱之亦驗。作喜雨謠以謝之。後至元二年也。

去年六月河水乾。已斷香秬不得餐。道人致雨作豐稔。遂復飽飯歌平安。今年五月梅雨少。處處秧科分不了。道人起就有司請。雨點如拳落飛鳥。秧田一夜皆青遍。婦耨夫耕不辭倦。豈意秋來七月中。百里河流又如綫。田家望雨兩月日。四山撐天雲不出。豆葉乾枯稻葉黃。烈焰張空燂金石。昨朝雲氣騰中天。白龍捲水蒼龍旋。滂沱一似去年雨。玉虎殷地雷施鞭。村南村北皆鼓舞。盡說幾時無此雨。誰能如此活焦枯。道人五日村西住。道人道人仙者友。三出玄功世無有。道人握手不言功。醉看青天開笑口。

發曹湖

曹湖東南大星起。灩灩光晶射湖水。兩髯搖櫓逆風行。浪花激船洒飛雨。我時起坐推蓬窺。天地黯慘開鴻龐。扶桑日出東海沸。波濤淜漾珊瑚光。迴風颺帆舟子喜。唱歌逕度三十里。樓閣參差見吳市。

送林子明嘉定賣藥

林君賣藥吳城東。此心自與神仙通。君今移家練祁去。好種杏萼千萬樹。花開爛熳功業成。綵衣歸舞春風輕。壘篋迭奏酌春醪。再拜堂前爲親壽。杏林千年芳不朽。

惟中自嘉禾歸謁賦此寄之

子居城南我城北。只尺相型太山隔。况當連日雨泮泮。蹇驢路滑那堪策。具慶堂前戲綵衣。青袍照映春增輝。阿翁欣欣阿嬭喜。世間之樂誰能比。我年六十頭盡白。猶向異鄉爲異客。夢中常憶春草軒。翩翩綵袖何由得。堂前綵衣不可忘。身上青袍門有光。更看拾芥取朱紫。錦衣曉拂天墀香。此時歸來爲親壽。里閭題芳傳不朽。我當匍匐登君堂。共奉金尊獻春酒。

送三茅陳嗣師還山

江南昔當全盛時。君居虞山我梁溪。相望百里如只尺。日夕言笑相追隨。干戈滿地事非昨。君住茅峯我城郭。十年旅食古長洲。鑿井畊田一丘貉。去冬避兵到琴川。君亦歸來省墓田。相逢一笑驚夢寐。羨君飄逸真神仙。神仙自有長生術。顏如渥丹髮如漆。凌風跨鶴上青天。噓氣成雲飛霹靂。是邦太守賢且慈。天久不雨憂民飢。請君默禱纔信宿。瓢翻馬鬣甘霖垂。四郊沾足民悅懌。太守徵詩頌君德。願君歸去奏茅君。爲瀉銀河洗兵革。

題曹氏春江雲舍圖

富春江上曹孝子。結屋深居白雲裏。重重簾幙護春暉。不出庭闈奉甘旨。門前江水碧泱泱。屋外峯巒紫翠光。山高水闊意無盡。堂上慈顏日月長。棠棣相輝萼萼。蘭玉森森映階砌。爛斑